

都監 命都監將未畢事計數以聞○丁丑木稼○設水陸齋
於觀音窟 上謂侍讀金科曰國行佛事予已罷之宮中婦女
冀其子延壽用私財或設禮懺或行水陸欲禁而未能耳○庚
辰祈穀于圓壇○辛巳賜崔潤馬一匹潤為 聖節使李至書
狀官還啟 皇帝待慰甚厚且謂戊辰年振旅之功莫大使禮
部主事陸顥鴻臚行人林士英等賚捧 詔書賞賜已過鵝綠
江 上喜有是賜○壬午夜四方有赤氣○癸未日珥○甲申
日珥日直日包日暈夜東南有赤氣○改各道都觀察黜陟使
為按廉使安魯生慶尚道趙休全羅道李垠忠清道李之直江
原道鄭渾京畿左道柳珦京畿右道李揚豐海道○乙酉演福
寺井水沸 遣左承旨李原祭之○以趙浚為判門下府事李
舒贊成事郭樞藝文館大學士鄭矩藝文館學士李至政堂文
學大司憲金若采中丞全順仍除本職其餘臺官皆補外柳斗
明密陽府使李灌知襄州事安從約黃州判官許稠完山判官
初稠為司憲雜端罷仕夜歸有鷹坊人十數騎臂鷹過行稠令